

Paddy Ashdown i Carla del Ponte zatražili od Parlamenta BiH da osigura da Odjel za ratne zločine počne sa radom do januara 2005. god.

Na sastanku održanom danas u Hagu, visoki predstavnik za Bosnu i Hercegovinu (BiH), Paddy Ashdown, i glavna tužiteljica Međunarodnog krivičnog tribunala u Hagu (ICTY), Carla del Ponte, naglasili su da nema nikakvog kompromisa kada je u pitanju dugoročno opredijeljenje za vladavinu zakona u BiH. "Nezavisni i efikasni sudski procesi u državnom Sudu BiH predstavljaju suštinski element reformi u oblasti vladavine zakona u BiH", izjavio je visoki predstavnik. Carla del Ponte je dodala da se "BiH obavezala da će osigurati efikasno procesuiranje slučajeva ratnih zločina u okviru pravnog sistema u zemlji – neispunjavanje obaveza u ovom smislu bi poslalo vrlo negativan signal".

Visoki predstavnik i glavna tužiteljica su razgovarali o napretku ostvarenom u uspostavljanju Odjela za ratne zločine, koji će BiH omogućiti da na efikasan način procesuiraju slučajeve ratnih zločina kroz vlastiti pravosudni sistem. Parlament će u toku sutrašnjeg dana razmatrati izmjene i dopune na postojeći Zakon o sudovima i Tužilaštvu BiH, te na Zakon o transferu slučajeva ratnih zločina iz Haškog tribunala (ICTY) u Sud BiH. Postignut je sporazum da bi neusvajanje ovih izmjena i dopuna ozbiljno podrilo nastojanja da se ratni zločinci proglase odgovornim za svoja djela.

Carla del Ponte je naglasila da "je od suštinskog značaja da Parlament sutra usvoji Zakon koji se odnosi na slučajeve

ratnih zločina, tako da BiH može ispuniti ciljani januarski rok za otpočinjanje suđenja ratnim zločincima.”